

Christian Meivah

September - October, 2018

Lhani seh thuso

Private Circulation



Tantih nei louva tao

Pakai Jesu hi taonaa hattah ahi. Mi 5000 avah vana a chun nga ni leh changlhah pheng ngabou cha pang khat in anei in, Jesun atao khu ma ahopsah a ahile mi 5000 in ane khop set in ahi (John 6:11). Lazarus kitipa chu athijou nili ahitan, Jesun Pathen henga atao jouvin ana hinsah kit tai (John 11:41). Thoh genthei puma thing cross thina ato ding chu akisong pon, Pathen henga “Hepa hiche khon hi kadon lousea kitol mang theilou ahileh, nangma lung got got hita hen” tin ana taove (Mt. 26:42). Van le lei kikhah-a thi dinga cross a akikhah chun, “Pa amaho hi ngaidamin, ajeh chu ipi abolu ahe pouve” tin ana taove (Mt.23:34).

Jesu nungjui christian khat kahi ti jousen, kipana hihen nopna hihen dana hijongle itaohat diu ahi. Pathen koma ngaidam thumna taona imang jiuvin, ahinla eihon midang kingaidam nomlou ahi jie. Mi aki ngaidam loule eijong Pathenin ei ngaidam lou ding aumsa ahi (Mt.6: 14-15). Jesun taona ana khohsah hi suhmil lou ding ahi. Christian khat hinkho hi taonan asemphat ahi. Jesu Baptise achan chun van lam anaven

chule ana taovin ahileh van kot ahung kihong in, “Kadei tah kacha pa nahin, nachunga kalung alhai ta ngei-e” tin Pathenin ahinsei jengin ahi (Luke 3:21-22). Pharisee hon tha ding agot jeh-u chun, “Jan khovah gei in Pathena ataove” (Lk.6: 12). Pathen chapa ahi vanga jan a imu louva, Pathen koma tao khovah anahi. Hitia atao hat jeh chun, seijui ten taona thupi dan Jesua konin ana hedoh un, hijeh chun, “Taoje neihi un” tin seijui khat in ana sei-e (Lk. 11:1). Jesu dia taona hibanga athupi leh eiho dia thupi cheh ahi ti sumil poute.

Joel themgao chu an ngola taona mang khat ahin, kale mao pum in anatao jie (Joel 2:12). Amite huh dohna ding thilgon anei chun, Esther in nithum twi donlou an nelou taona amange (Esth.4: 16-17). An ngol tao na hin, mi khat taona asuhat jep thei jie. An ngol taona mang hon, kipah tah-a abol diu ahi. Mat. 6:17-18 in, “Na an ngol chu miho hetsah louvin, guhthima um na-Pa hetsah in, chutile guhthima vejing na Pan kipaman pejon nate” tin akisune. Tulai hin, tahsa damlou jeh a an ngol bol thei lou mi jong aumin, amaho vangin an ngol bol daule pha ahi. Dammo cheh na dia an ngol bolda ding ahi.

Gucha banga hung ding

“Pakai nikho chu gucha banga hung ding ahin, ahung nile chun van ho chengse ging lul lula, kitolmang hel ding, thilbul chengse meikouva jol mang soh ding, vannoi leiset le asunga um nakitong jouse jong kavam soh hel ding ahi” (2 Pet.3:10). Pathen gam ahung lhun teng van umta lou ding, leiset jong umta lou ding, chule thilbul chengse jong mei-in akahlhah ding ahitai.

Hia ‘thilbul chengse’ kiti hi ipi nahi sah em ? Amaho hi Pathen in mihemte ihinna diuva eipeh hou chu ahi (basic elements). Hichu mei, hui, leiset le twi ho ahiuve. Hiche ho sese aumlou teng, iti nahin thei ding hitam, kigelphan. Bible katahsane, tijousen hiche thu jong kitahsan tha ahin, Christian dihtah hilouho din mun abeihele. Pathen thu noise hih beh ute.

1974 chun Editor pa hin, Churchandpur ana vilnaa, Paite nu mei nungah til khat in Meilhei la khat asah tape-record a ana khume. Ala chu, ‘eigi punsi asina Jesu amuk ukhini. Mana amuk lakpada, eina unani soidana’ kiti hi ahi. Athu chu, ‘kahin kho hin Jesu amu kit ding, ama ahung kitni leh thon louva ka kimuto ding ahi’ ati ahi. Hiche la hi ama le aloi hon ana phudoh ‘Gospel Melody’ kiti Pathen thusei loi hon, amaho labua atat doh un, ache chenuva ana sauvin ahile tulai hin ala hi sathei mi atam tan, paochom

2

tho phabep in jong amaho paovin akileuvin, asa tauvin ahi. Jesu ahung kit teng kakimuto pi ding ahi, ti la lagil christian dihtah khat in anajih hinte. Asem hon giltah a asem hi jongle asahon athupina aheth louvule amaho din apha chompoi.

Peter in Jesu Second Coming thu hi kicheh tah in eihil uve. Jesu in asejuite adalhad konin aheng uva, “Nangho lungkham hih un, Pathen tahsanun, kei jong neitahsanun” tin ana sei-e (John 14: 1-3). Jesun hitia asej vanghin, tulai hin christian ho lah jenga jong Pathen phatea tahsan lou aume. Kivailhahna thuho hi asej jouva, ahinga Jesu vana lah touva aum chu, seijui hon amit tah un ana muvin ahi (Acts 1:6-11). Tu nia nangman Jesu hungkit ding thu hi nagel doh nah em, ahiloule nasuh mil em ? Jesu hungni teng van gam jonin cheta hih in lang, dalhad in um tale chun i-nati tadem ? Nada na dinge !

Second Coming nikhoa Jesu toh van gam jonlou mi chun hoilam ajon tadem ! Van le lei abon cha mangthai ta ding, hoi-a umtan natem ? Jesun hiche thu hi akam tah a anasei ahin, tahsan lou thei ahipoi (2 Pet. 3. Mat.24-25). Vana nom tah a, Jesu toh chengkham ding na dei em, ahiloule satan kigona ding Damun meidil in nang jong nago go ding nadei em ? Tu hinna kot ki hon pet-a hi lut jeng ngai ahi. Noah nikhoa kong sunga lut lou sese thi chu phaten geldoh jingute.

Missionary te insung

Pathen natong ho pastor, evangelist, missionary ho lah-a hin Pathenin anatong dia alhen mong ho aum jin, amaho hinkho hi nom dia igel vangun, anom poi. Toththei dang lampi amulou phat-a Pathen na kitongjo tahen, tomo huhnan, ti loi jong aumin, amaho hin nopna, haona thei lampi aha holun, leiset a din ahinkhou anomdom jie. Chung a pan vang atah le alhem ahenai. Atah tah-a Pathen natong ho vang ahinkhou ahahsai, achenna agenau kisuh jilou, sumle pai lhasam jiu, acha teu phatea lekha simсах jou louvu ahi, jie. Ahinla Pathenin ama ho hi ahen, phatthei bohna jatchom chom apen, sumle pai-a ahahsat behseh tengule mihem koma thum louva Pathen koma athum jiu, Pathenin jong amohvet jipon ahi. Aki hinsona diu lampi asempeh jiuve. Alungjin alung gimnau atam lseh ji vangin, Pathenin an ngola thina ho vang apeji pouve.

Jipa in Pathen na hatoh-a atoh tengle a-insung aveman jipou vin, hiteng chule Pathen lama lha sam jep jinu ten, “Kajipan ei lungset louvu hitam !” tiho agel manchai jiuve. Billy Graham chu vahdoh behseh-a, insung le chate ajinun pumpoh-a apoh ahin, amanu hin insung apoh-a agenthei thu lekhabua asut akisimle lungset set aume. Hou natong dangho phabep jong chutima ahin, ahetem jinu nei

3

kha ho leh taonaa hat jinu neiho chu Pathenin adonda deh pouve.

1. *William Carey* jinu Dorothy ahin, 1781 chun ana kicheng lhone. Ama nu hi lekha athem behseh poi. Ajipa hin kengkoh semna dukan-a na ana tonge. Hiche dukan bolpa chanu hi ana kichenpi ahi. Kum phabep jou vin, Carey hin India a Missionary hiding ana deitai. Acha thum apeng tan, chule Dorothy chu anaovop pet anahi. Carey in ajinu Dorothy henga India a cheta hite, Missionary gahi ta hite, atile ajinu chu anom tapoi. Hiche phat chun Carey in ajinu le achate England a adalhan, achapa lenpen (atahpen) Felix chutoh India ahin jonlhon tai.

Konga ahunga ahile India aphah konin, India sunga lut theina ding alekha alhing pon, England a akinungle kit tan ahi. Lut theina Licence phatea akisem chai in, ajinun jong cha anei tan, aji acha puma hung din lunggel anei tai. Acha peng bep nalai chule acha dang thum ho chutoh kong chung a lha nga lampi ahin jot diu chu ajinun agelleh ana kingapcha hih beh jenge. India ahung lhunu chun, asumla kichaita, titho khosih, buhse nat avei gam tauve. Adamlou jeh chun achapa lenpen jong chu athi tai. Avaichat utoh, achapa thitoh, Carey in Pathen na hatoh-a atoh a insung apum don da phat chun Dorothy in, “Kajipan eilungset pouve” tin ana kilah tan ahi. Hiche chun alung asuboi vallin, ama

4

nu hi angol tan, insung indan khat bouva ana umin, imacha adon ta poi. Ahung hiti phat hin, Carey hi agim val jeng tai. Insung avet toh, achate avettoh chule Pathen na atoh toh pumboi in aboi tai.

Hitia aboival phat chun, England a aloipa khat henga, “Kei hi vannoi leiset muthim gama ka chengin, kachang seh kahin, kaki hetpi christian khatcha jong aumpoi. Ka-insunga mi tampi achengin, ka ngaichat thil chohna ding sumle pai jong kanei hih beh in, kalung agim val tai” tin lekha ana thot in ahi.

2. *Hudson Taylor* hi, China gama Missionary din, 1867 kum chun ajinu Maria Taylor leh achanu kum 8 hinalai Grace toh anachei. China gama huile go umdol ama ngaina ahilou jeh in achanu anatlon athitai. China ten houthah hung lut ahi ati uvin, ajada uvin, 1868 in ainu mei in ahal-lha tauve. 1870 kumin ajinu jong adamlou jeh in athi. Hudson in lungthoi louhelin Pathen na ana tongin ahileh 1900 chun Jesu kisan mi 13,000 alhing tai.

3. *Adoniram Judson* hi ajinu Nancy toh Burma (tua Myanmar) gama Missionary din anachei. Hichelai hin Burma gov't. leh England gov't. ana kitoh pon, hijeh chun Adoniram hi Burma alhun lhunin songkula akhum tauve. Indan neo cha, anamse, ajinna jing khat-a akoi un, ajinu ma chu naovop ahin,

ajipa akimutopi ding jong aphalpeh beh seh pouvin ahi. Ajinu hi achang in, vaicha tah in, ana chenge. Amanu hin nao ahin neitan, aneh achah akisuh lou jeh in agong lseh in, atha alhomin, acha jong chu pha ten ana vejou tapoi. Chubanga agim tah jeh chun jail ngahpa henga ajipa chu chomkhat ahinlha dohna din ana thum tai. Jail ngahpa chun niseh in sun in phat chomkhat khat aina ana sol tai.

Adoniram in numei nao noi chepsah thei ahol jin, niseh in khat vei vei acha chu noi ana chepsah jie. Chomkhat jouvin, atahsa lhah sam behseh jeh in ajinu Nancy athi tan ahi. Abanin apa'n sunkah kaha acha anavah vah jap jeh chun acha jong chu adei banga neh le chah mu lou ahi jeh in athitai. Ajinu le acha phatea anajen tah lou jeh in, Adoniram hi alung ana lseh jenge. Ama toh aumkhom nom laitah a aum khompi joulou jeh chun, alha ase lseh in anahi.

Missionary ho hinkho man dan hi asunglam akikhol chilleh lung set umtah ahi jiuve. Hiti hohi hetpeh a asoldoh hon, alhahsamna jouseu phatea hetpeh ngaitah ahi. Amahon agenthei nau aseidoh nomji pouvin, ahinla leiset mihem hinaa adoulelu atam jie.

Kipana hinkho nei

Pathen bei-a mihem in nop nale kipana amujou poi, tihi leng Solomon in ana holdoh-e. Ching tah

a kingaito mi khat in Pathen sang in aching poi, ti akihet doh ngai ahi. Kipana, lungmonna, nopna dihtah hi chung a kona ahiloule leiset-a thil hon koima apethei poi. Penah nah jogle asotpoi. Ecclesiastes lekha bu 1:2-3 in, “Panna bei jeng, panna bei jeng ahi, tin thuhilpan ase in, ijakai panna bei ahije. Nipi noi-a natoh thilbol hijat abola agimna hi, mihemin ipi phatchomna anei mong hinam?” Nipi noi-a thil hoa kinep hi pannabei ahin, nipi chung lam joh khohsah angai-e, ati ahi.

Thuhilpan amudoh hi, lhagao lam thudol ahi. Lhagao lam thudol hi nipi noi-a akimu pon, nipi chunglama van gama aume, ati ahi. Vannoi leiset a kona kimu kipana leh nopna in mi koima tonsot din kipana nopna aepoi (Eccles. 1:16-18). Thuhilpa Solomon hi vannoi-a miching tah ahin (1 Kgs. 3:9-12), Pathen pang louva chihna jouse pan na bei ahisah-e (1 Cor. 1:20-21). Ama hi aching tave, tia kihe mi khat ahin, ahinla athi tei-e (Eccles. 2:12-17, Heb. 9:27).

Aman aseibena a hin, sum hao, nei le gou hao, kiti hohi tonsot dia kipana nopsahna ahipoi, tijong aman amudoh ahi. Hijeh hin leng Solomon in haona kiti jong hi panna bei ahi sah-e (Eccles. 4:7-8). Aman athumna aseinaa, nipi noi-a kona kimu kipana leh nopna ho hin mi khat lhingset in kipana leh nopna ape joupoi, ti jong amudoh-e (Eccles. 2:1-11). Don-in, nen, kinopsah in

kiti hoa hinkho mang nom ho chu angol ahiuve (Lk. 12:19-21). Chuin ali channa Solomon in amudoh chu, nopna le kipana dihtah hi Pathen thu phatea jui-a konin akimui, tihi ahi (Eccles. 12:13-14). Vannoi-a mi ching penpa Solomon in Pathena ima jouse angamin ahi. Hijeh a hi eihon jong ama mudoh hi itahsan uva ilungu chunglam thila idimsah diu apha pen ahi.

Nakhut a ipi um ham ?

Mihem khat khut ah agu 27 vel aume. Khut hi moh um thim lou, chat jing ahi. Khutjung hoa thajung tampi pi aum jeh in, ima khat itham khah teng u leh ipi ithamu ham ti akihedoh jenge. Mihem khat khut in apha jong ase jong abol thei-e. Hijeh hin, ikhut-a ipi um em, tihi phatea het ngai ahi.

1. *Mose* : “Nakhut a nachoi chu ipi ham ?” tin Pathenin Mose ana donge. Mose’n tenggol khat akichoi pet ahi (Exod. 4:1-20). Tenggol hin sei ngaina avetsah ahi. Ingaichat-u Pathenin ahei. Pathenin eima khut a thil chu amangchan, eikithopi jiuve. Hiche tenggol hin Mose’n Pathen alung lhai sah thei in ahi. Tenggol hin Pathen chate ahudoh jouve. Teng gol hin thil kidang tampi anabol jouve. Hichu Mose’n Pathen thu ajui jeh-a bou hithehi ahi. Ikhut-a thilpha ija um jogle Pathen sei ngaina akiman lou tengle pannabei ahiji tai. Pannabei hi manlou thil ahi.

2. *David* : Nakhut a ipi um em ? (1 Sam. 17:38-40). David khut ah songchang khat bou aume. Hiche seh chu toh Philistine pa kidinte din anachei. Akhut-a achoi song chun tahsan avetsah ahi. David in Pathen atahsane. Mihem jolou ding jong chu Pathen kithopina tahsan pumin ana pange. Pathen toh kilhon ahijeh chun, gal thempa gal hatpa, mihon agin penu Philistine pa chutah kisat din anapang jenge. Pathen atahsan jeh chun ajo lou ding jong ajou thei in ahi. Philippi 4:13 in, “Eihatsahpa vanga, chu ijakai bol thei kahi” tin aseie.

3. *Chapang khat* : Nakhut-a ipi um em? Ama khut ah changlhah pheng 5 leh nga ni seh aume (John 6:1-15). Chapangpa changlhah leh nga chun, kinepna kiti chu eihet sah ui. Nehthei hon aneho oivana apen agilkelte din kinepna ahi. Nanei chu midang napeh tengleh nang jong mi jong oiva ding ahi tihi aseie ahi. Hiche chapang pa hin, ama oivana ding seh agela amakhm ding ahin kipoh vangin, Pathen minin apedoh in ahi leh mi 5000 oi avaloi. Ama jong avathou thouvin ahi. Inei kham ipeh doh teng, hia chun thil kidang apang jitai.

4. *Jesu* : Jesu khut a ipi um em ? Jesun Thomas henga, “Nakhut jung in hin khoiyin, kakhut teni hi ven, nakhut lhangin lang kanah thamin” anati (John 20:26-28). Jesu khut thingkil in asut homna chun, eiho koma lungsetna dihtah ah et sah in ahi. Ngailut khat dia ihinna phal jou

kiti hi lungsetna thengtah chu ahi. Hiche lungset tahtah hi tem temin akimu poi (John 15:13-14). Sopi, nakhut ah um chu ipi ham ? Nang khut-a jong ipi ham khat umah ahi. Jesu nungjui nahi tah em ? Nakhut a um chu Pathen din mangchan, lung opkai louvin mangchan, hia chun kinemin, aga namu ding ahi.

Lhagao hinkho thah

Pakai Jesu tahsan jouse Pathenin tonsot hinna apeh-a, Jesu toh hinkhom dan solchah Paul in ahilchetna Rom. 8:1-17 a kisun hi phatea hetchet ngai ahi.

1. *Jesu toh hinkhomna lhagao kipe ho* : Rom. 8:1-4 a hin, tahsaphe hinkhoa hithehi lou hel, chu Jesu tah san jalin tonsot hinna Lhagao apeh ho Jesu Christa toh ahinkhom phat un, them achang tauve. Chule Christa toh hinkhom sah-a chu Pathen Lhagao ahin, chonset jeh-a Pathenin alahdohsa Lhagao apeh phat-a chu, danthun ajolou chengse ajosah a them chang ahi tauve. Danthun chonse chu thitei dinga aseisa chu, molsona dinga Jesu chonse louhel chu, chonsete lhatdohna athipeh phat a, Lhagao changa them chang ahi tauve.

2. *Pathen Lhagao le tahsaphe hinkho hinkop* : (Rom. 8:5-11) Pathen Lhagao chun Pathen dei-a hing dinga Jesu tahsante alamkai ahin, mihem tahsaphea pansa satan chun

adei lama Jesu tahsan ho gei-a apui mang nom ahi. Mihem dam theina dia neh le chah jouse chu aboncha neh-a don ding ahinai, amavang Pathen deilou bola satan dei so dohna thei jouse bol lou ding ahi (Gal.5:19-21). Jesu tahsan jala Pathenin Lhagao apeh ho chu thina kona hing doh ahi tauvin, Pathen dei-a bou hing diu, Pathen mah boldia athisa kigel diu ahi.

3. *Pathen insung houbunga lutna thei* : (Rom.8:12-17), Christiante Pathen Lhagao kipe ho chu satan dei tahsaphe dei bang hilouva, Lhagao-a Jesu toh hingkhom, Pathen insung houbunga lut ahi tauve. Pathen Lhagao le Jesu tahsan eiho mihem lhagao toh kitho khoma Pathen insung mi, achate ihui aheth tohsah ahitai. Hijeh chun Pathen chu "Hepa" iti thei tauve (Rom.8:16). Pathen chate ihitah jeh uva, Pathen gou jong ilo diu chu tonsot a hing jing Pathen Lhagao toh ihin khom diu ahitai. Hijeh a chu Pakai Jesu thoh banga ithoh diu angai-e.

Rom. 8:1-17 sung hi Pakai Jesu tahsante Lhagao leh tahsaphe lhagaova hinkhomje eihil chenu ahin Lhagaova hinna chu hahsa hen, thipi ding hita jongle kipah tah-a hinkhom jing ding ahi. (Dr. T. Lunkim)

Gou kiselna mun

Mt. 13:44 "Vana lenggam chu, lou lai-a gou kiselguh mi khat

in amudoh-a ima akhu khum a, kipah tah-a chea anei jouse joh-a, hiche lou chu kichoh jeng tobang ahi" tin akisune. Pakai Jesun ipi thu lem eisei peh-u hintem ! Eilungset behseh jeh uva, Pathen gam imu thei teina diuva, tekah thu, thulem tampi tah eisei peh-u ahi. Akidang in, aloupi-e ! Gou kiselguh gamupan, anei jouse sanga lujo loupi jo akimu doh ahi. Hijeh chun achen, alou pum in acho jenge. Alou pumin chohih leh gou chu kilai doh jong le chang deh lou ding ahi jeh-a, alou puma achoh ahi.

Hiche thulema kona ikisei peh nomu chu, athulem sei hi agilna thei lamtah-a sei peh ding hilouvin, hetbai lamtah-a, sei ding apha. Jesu in hetbai lamtah in thu eihil jiuve. Gou kiselguh mudohpa banga, eihon jong van lenggam hi igamu masah cheh-u hitave leh, oh, tulai mi koiman hito bang tah hin Jesu heimilji ponte. Thu seipeh peh a, hil hil jong ngaita ponte. Gou kisel mupa banga, eihon van gam imu masah lou jeh uva, eiseipeh diule eihil diuva Pastor, Evangelist, Missionary lo kipea kigoi-a ahi. Aki goi akisol mi abang jong vang lo ima cha mulouva umkit ahiuve.

Tulai hin Gov't. service hi min adei cheh-e. Gov't. service mutheina din, lekha hasim loi, anei agou itcha louhela kihabol atame. Min natoh khat muna din, anei agou ajoh jin, akichoh ngam jin ahi. Thu nei ding, vaihom ding, jile chate vahna ding, in-hoi kisahna ding tiho

adei jeh-u ahi. Sopi, nangin jong na Pakai in van gou nakholpeh hi mu chen le chun iti nakipa tadem ! Ni khat Jesun thulem ase in ahile Pharissee ho lungto akitoh pon, angai nom louvu chu Jesun ahen, aseijui te henga, kathusei ho chu nanghon nahet nah um, atile amahon, henge, kahe tauve, atiuve.

Chuin Jesun ase juite jah-a, van gam thuguh chu nangho kipe nahi tauve. Ahinla, amaho hi kipelou ahiuve. Ijeh inem itile, amahon amu vangun amuchen thei pouvin, anaa ajah vangun angaina je jong ahepo ve, ati. Nanghon vang namu jeh un, mi nunnom nahiuve, nanauva najah jeh un anunnom nahiuve, chule nang ho thilmu hi themgao tamtah in mu atup lleh jengun, amuta pouve, ajah nom vangun, aja tapouve, ati (Mat. 13:11-17). Van gam gou mugo ho chu aumthim thei pouve. Peter heng a, tukal Jesu minin thu seita hih in, atiuleh Peter in, keihon kamuu kahet -u chu seilou thei kahi pouve, Pathen thu kapai lhah uva nangho thu joh kangai diu chu Pathen mit mua dih nam, tin ana donbut-e (Acts 4:19). Jesun jong kut kichai nin, hasap sap in thu anasei in ahi (John 7:37).

Pathen kimu doh, van gam gou muthei ho chun, mitlhi pumin Pathen thu ase in, la asa jiuve. Thilong mulou lai-a koi kap ding ham ? Thilong amu jou tengle bou mi akap pan jiuve. A Pakai Jesu ama dinga thi anahi, akihet doh le

a tahsan ho kapji ahiuve. Mose in Canaan gam gavelhi din mi 12 asolin, ahung kile phat un, mi 10 hon ichelut louhel diu ahi, ithigam lo diu ahi, agama miho chu alen thei un, keiho chu khaukhopite bou kahiueve, ilah uva lamkai ding kilhen utin, Egypt gama kile kit taute, atiuve. Ahinla Joshua le Caleb in vang, iche lut tei tei diu ahi, agama mi alenho jong Pathenin eijosah diu ahi, agama neh aput in agamga jong aphan ahi, atilhene. Chuin mi 10 ho chun ama ni chu songa selih ding atiuve. Hiche gam gave ho thusim bangin, tulai houbung ho jong hin, abailam lama anom lam lama, Pathen hou ding, Pathen na toh ding, tihi ahagel jo tauve. Hichu nangin, iti nagel em ?

(Rev. Seikholen)

Nupa kikah thu

Tulai christian hon ihet diu chu, Pathen gingtah a inchen ding hi ahi. Jinei kiti hi hinkhoa khat vei bou ahi jin, hichu houdan thenga aki ji nei-a ahile ihinkhoa ilung nom ahi. Pathen mina kicheng ho mi vangpha ahiuve. Akicheng jousen thil li hi Pathen gin toh goma anit din apha.

1. Eph. 5:22-24. Mihem ten Pathen agina athua anun bangin, jinu te jong ajipa thun nunghen, tin akisune. Insung hi mi ijat cheng jongle khat bou ahin, mi khat in vai apoh-a ahop tohji ngai ahi. Jipan jong chule jinun jong insung khat vai apoh kop thei lou ahi. Pathen thua inun banguva,

jinu chu jipa thunoi-a aum angai-e, tin Bible in eihil tauve. Hichu kija bolna thu ahi. Houbung khat chu Christa thua anun tobang ahi. Ahin la jipa chun amopohna Pathen ging tah-a apoh hih-a, chonsetna lama insung mi pui ding agotle vang, jinu chun mihem sei sanga Pathen sei aginjoh angai-e (Acts 5:29).

2. Eph. 5:25. Pasal ho Christa'n houbung angailut-a, amatah akipeh doh jeng bangin, najiteu ngailuvin, tin akisune. Lungset theng tah a hin kipeh doh apang jie. Jesun houbung tichu ama tahsante alungset dan chu ama thisan ato jeng ahi. Hichu pasal hon ajomu angai-e. Ajinu ngailu ho chun a-insung jong angailut jiu ahi. Jipan ajinu alungset ding dan hi, gil tah ahin, tem tema kimudoh thei ji lou chu ahi (1 Cor. 13:4-5).

3. 1 Pet.3:7. Pasal hon numei ho chu alhasam jo, bel kehbai tobang in gelun, ati. Jinu chu itobangin lekha them hen, ching jongle lhasam jep teiji ahi. Ajeh chu Pathenin numei dia atahsau anasem ahi. Hiche hi het thema jinu noise bol lou hel ding ahi. Akiphin nomlai, aka nomlai, alung hem nomlai aume, ti hetpeh ding, mohpho phoa jotho lou ding ahi. Ngailut ding, ngaidam hat ding ahi. Achuti loule inchen nomlou ahi. Ji pan Pathen agin jing loule ajile acha iti athunun ding ham, ti atahsan angai-e. Pathen ginglou ten Pathen phat thei boh amupoi. Pasal hi insung khat din aluchang ahi, kitijong

leh ama chun ajinu chu soh tobang ahiloule thil khat tobanga abol lou hel ding ahi. Pathenin mihem khat a asem ahi, het angai-e. Insung khat a jipa le jinu natoh lama kibang ahi ti suhmil lou ding ahi (Mt. 20:20-28).

4. Eph. 4:31. Hetna thepna kibang kicheng ho insunga kidintena atam jin ahi. Thusoh khat aum tengle pasal in ajoa pham numei in ajoa pham tiho geltoh ahah jin ahi. Hijeh a hi, amani hi akidep them lhon ngai ahi. Kitona khat aneiji lhon angai-e. Ajou ding kichu sanga, aphajo ipi ham hol a hichu jui ding ahi. Koima ima jouse hea thema, chamkim (perfect) aumpoi, tih ageldoh ji lhon ding ahi.

Kija toa, kijen to ding ngai ahi. "Thukha jouse leh lungsat lunghan, kinah, kitaitom, chule git louna jouse nanghoa konin paimang un" ati (Eph.4:31). Jipan insung alamkai ding chule jinun insung asemhoi ding ahi (Gen.3:17-19). Pathenin pasal kithopi dia, alhahsam na jousea panhu dia numei anasem ahin, hichu jinuten ahethem diu, ji pate alhahsamna, alhinlelna jousea pan alah uva, mi dangin ajiteu anoise louna dia adinpi ji diu ahi (Titus 2:4). Insunga chate nunle khana aphabetna diuva, jinu ten achateu aumpi jingu angai-e. Jinun insung vetup louva, polama sum losanna thei akingaito teng, achate vetup ding, hiltup ding mi aumpon, achate chonchan phat lou, sei ngailou aumlo jie. Cha nei nupi ten hiche hi phaten gel un.

Nui-o, damna ahi (Prov.17:22)

* Chapang khat in apa henga, ken Bible in mihemte ipi ahillam ti ka hetai, atin ahile apan, ipi ahil ham, tin ana dongin, chuin chapang chun, "Vannoi leiset idalhah masanga iti hin ding ham" ti eihilui, anati.

* Insung mipa khat hi jingkal in athi san amudoh ui. Ajinun police akou vin ahile police in amaho jouse aban banin thu adonge:

Ajinun : Ka-ihmut pet ahi.

Buhon pan : Breakfast kaseme.

Mali : Pahcha ho twi kachap-e.

Asohnu : Ken postman chithi hin choi kagalai, anati.

Police in sohnu chu aman tai. Ajeh chu, jingkal matah a postman hung angai ahipoi.

* Sunday kaikhomnaa Pastor pan mipi henga hitin ana sei-e :

"Tunia keima sermon hi nangho sumto chung kingam ding ahi. Na sumtou chu dangka 4000 alhin leh ka sermon minit 15 hiding, sum chu dangka 1000 vel bep ahile sermon chu minit 30 hiding, dangka 500 vel ahile minit 40 hiding ahi. Tun nang ho kiging tauvin, Sunday kaikhom sumto chu petau hite" anati.

* Nikhat pasal khat lampia ache leh lampama Torch-light khat amun, akilah in, apona anot thenga ahileh amasanga pasal alet-a lentah khat ahung dingin ahenga, "Tuhin nangin nathum nom khat thumin, nahin penge" ahinti. Pasalpa chun, "Hepu,

tohding khat neipen, hichu insung pasal khat dia atohmo hel hihen, chule insung mipa khat in atohnom louhel khat jong hile kadei-e" anati. Mi lenpa chun ama chu ahin ven, "Kipah jingtang, tua konin nangma hiche insung minu khat hitan, hichu nadei chu hiding ahi" atipeh jouvin, amang del tai.

* Mipa khat in achapa akipui in school khat a amin khumna ding in, Principal pa akimupie. Principal pan, "School a seat aum tapoi" ahin tileh achapa chun, "Ojapu, hichu thil hah ahipoi, kapa hi Carpenter khat ahi jeh in, kei touna ding Seat khat Free in eisempeh nante, olmo hih in" tin ana seiloi chalin ahi.

* Sihmi nga in chini san tumneo khat amu tauve. Sihmi liho chun avopun aneuvin akichuvin ahi. Sihmi khat vang chu aning lang khat-a akap kap tan ahi. Amahon, "Hungloi tang, kinechai ding hitahi" atiuva ahi le aman amitlhi pumin, "Ohe, keima hi mi vangse kahi, Diabetes nat vei kahi" anati.

* Soh chapang khat in, inneipa heng ah, "Hepa, kamit in thil amuchen joupoi. Kamit vethem ding khat koma neipui in" atile inneipa chun polama akou doh in, van akoh in, nisa chu avetsah in, "vete, vana nisa khu namu nah em" tia adohleh aman "Kamunai, kamunai" anati. Chuin in neipa chun, "Achutileh, hiche sanga ipi agamla jo namu thei lou umtan tem" tin ana sei-in, chapangpa chu jen ding jong anati tapoi.

Het-a phachom ho

* Cold Drink, ho leh theitui dondia semsa kijoh hoa chini (sugar) atam pan behseh jeh in, koiman donda le aphai. Chapang ho ha jong alhou sah pon ahi. Hiho don behseh hon nat jatchom chom Diabetes, lung chang nat, kitiho avei jiuve.

* Mixed Marriage (kichen hal) kiti hi deimo umtah ahin, akicheng lhuma jong lhomcha bou ahi. Nui dan, neh dan, insung mite toh kihoudan jong chomjep teiji ahin, nule pa, nile gang, ho din jong anommo sesu jie. Hou lama jong khat a kilong khom thei jilou ahi. Chapa chanu ten hiche hi melchih leu pha ahi.

* *English kithem chuhna* :

- Decennial = occuring every 10 years.
- Duodecennial = every 12 years.
- Hebdomadal = every 7 years.
- Millennial = every 1000 years.
- Quadrennial = every 4 years.
- Quadricentinnial = every 400 yrs
- Quincentennial = every 500 yrs.
- Quinquennial = every 5 yrs.
- Quotidian = every day, daily.
- Semicentinnial = every 50 yrs.
- Semidiurnal = twice aday.
- Vicennial = every 20 yrs., 20th. anniversary.

* NASA ten Parker Solar Probe kiti satellite khat vana asolun, hichun nisa hi itobang thil ham ti akoma ga lenglut-a ahinkhol ding ahi. Kum 7 lampi ajot jouva nisa koma lhung bep ding ahi.

11

* Phramacy lampang sim din mi athanom pon, ahinla tulai hin kivah na thei tah khat ahitai. Tillai chun lou homdoh bou ana huiuin, tulai hin lou semleh lou phatna setna hechil laha apang tauve. Sim dia phatah ahi.

- 12 Class science chai hon, Diploma in Pharmacy, kum ni asim thei-u ahi.
- Degree in Pharmacy, kum li.
- Master's Degree in Pharmacy,
- Doctorate Degree in Pharmacy, kum 6 course.
- MS Pharm / M. Tech Pharma, hi B. Pharm. chai hon kum ni asim diu ahi. Aban simnom in Ph.D. jong asim thei ahi.

* *Mobile mankhel lou ding* :

Mibile, Whatsapp kitiho hi thuse seinan manlouvin aphai. Tuchung June 8, 2018 nia Assam a Dokmoka Area, a gollhang ni gari hintola kholai leng, amuna mi khat in chapang gu hidia aloipa henga aseleh aloipa te chun agari chu anatin uva ani lhona avohlih-u, gimnei tah ana hin, kholchilna bei-a Mobile thu sei tahsana mi voho chu tun jong jail a aumui. Hijeh hin thu phalou ijah tengule phaten kholchil ute.

- * India sunga Airport masapen ... Juhu Aerodrome, ahi.
- Vannoi a Airport lenpen ... Hartsfield-Jackson Atlanta, ahi.
- India sunga Airport lenpen - Indira Gandhi International Airport, Delhi ahi.
- Heathrow Airport hoikoma uma ham ? - London khopia aume.

12

Christian Meivah - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Nagaland a sumto peh na thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahan Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikhohlam, Ideal school, ccpr.
- 7) Rev. Seikhohlam, Medziphema, Nagld.
- 8) Mr. Seikhohlam Singsit, Kohima.
- 9) Mr. Kapcha Singsit, Dimapur.

Het-a phachom ho

* Bongpi hi la ngeitah tah ho aki ngeisah-a, anoi akilhoh leh anoitui atam jep jie.

* Kaikong (shrimp) jouse apen teng achal (male) ahin, ahung ki khalhit tengle anu (female) ahi jie.

* Australia gama mihem 17 million achengin, a kelngoi-u hi 150 million ahi.

* Christian Meivah thuso lahna man Bank a hinthot nom hon hia hinthot un, chule namin le nasum thot jat chu Editor pa henga SMS or phone in hin hetsah tauvin :

M. Haokhothong, Bank of India,
Branch - Khanapara, Guwahati.
S/B A/c. No. 500910110000191
IFSC Code BKID 0005009

Christian Meivah
September - October, 2018

PRINTED MATTER

To :